

Hebreos

1 Jecy ja'a Dios quiuguexy quiejxy maa hõjts nhaphájtäm maa hõjts ndeedyhájtäm. Diosmädia'agy-yajwa'xpä hajxy quiejxä. Mayhooc hajxy quiejxä. Madiu'u hajxy miädiaacy. ²Tøø ja'a Dios ja'a yHuung hajxy yaa xyajnäguéjxäm hädaa yaabä naaxwiin. Cahnä jiegø'ø y coo yaa tøø yhoy. Je'e ja'a Diosmädia'agy hajxy tøø xjiaac hawáanäm. Jequiän je'eduhñ wyinguejxä coo ja'a xøøwiin naaxwiin yhädiúnät cøxiä møødä xøø, møødä po'o, møødä madsa'a. Mänit yajnähdijjä coo yhané'emät. ³Jaduhñä Dios yHuung miøjjä jiaančhä nebiä Diosän. Tu'ugjoot tu'ugwiinmahñdy hajxy yhity. Jim hajxy yhane'emy cøxp chaads hädaa yaabä naaxwiin. Tøø hõjts hoy xñähho'túütäm. Tøø ja'a nbojpä ngädieeyhajxy xyajnähwáatsäm. Mänit jim ñøxtägajch tsajpootyp maa ja'a Diosän. Jim je'eduhñ yhanehmbä jada'anäbaadyñä.

⁴Ja'a Dios yHuung, maas møj ja'a cuhdujt miøødä quejee ja'a Dios mioonsä ja'a tsajpootypähajxy miøødä, je'eguiøxpä coo je'e Dyios yHuungä. ⁵Cabä Dios ja'a mioonsä mänaa ñäma'ay:

Míichhøch jäda'a ndehm yHuunghadaamby.
Ni mädyii mioonsä quia'a nänømy:
Yø'øjøch jaduhñ
xTieedyhadaamb;
nHuunghadáambiøch yø'øduhñ.

⁶Coo ja'a Dios ja'a yHuung yaa quiejxy hädaa yaabä naaxwiin, mänitä Dios miänaañ:
Wéenhøch nHuung
xwyiingudsähgøøyyä ja'a nmóonsøchhajxy, ja'a hajxy jim tsajpootypä.

⁷Paquiä Dios ja'a miädia'agy quiudiúunäxä ja'a mioonsähajxy, nebiä pojtgoy wiäditiän, nebiä padooy wiäditiän. ⁸Pero ja'a yHuung, je'eduhñ ñämaay:
MDioshajp miich, homiänaajä miich mhane'emy;
homiänaajä miichä tøyhajt myega'añ.

⁹Mdsojpy miich ja'a tøyhajtpä; cabä haxøøgpä mdsoy.
Maas jootcújc-høch miich nyaghity quejee ja'a nmóonsøchhajxy, ja'a hajxy jim tsajpootypä.

¹⁰Jaduhñä Dios jiaac mänaambä:
Miičh jecy mhädiuun ja'a naaxwiimbä møødä tsajpootypä.

11-12 Cuhdägoyyaambä naaxwiimbä mөөдä tsajpootypä; tågatsaamb jaduhñ; jaduhñ jiada'añ néjjiämä wit coo tiujnä; caj tiuungpaadaannä. Pero miičh, cөjxta'axiөө miičh mhida'añ; caj miičh mjugyhajt mänaa quiөxa'añ.

13 Cabä Dios ja'a mioonsä mänaa näma'ay:

Yaačh miičh xmiөөdhané'emät.
Caj miičh mmädsip
myajmäjäda'aga'añ.

14 Ja'a Dios ja'a mioonsähajxy ja'a tsajpootypä, jaduhñ mäwíinäts hajxy je'e nebiä pojjän. Cab hajxy quiähxө'ögy. Dios jaduhñ quejxp coo hajxy piuhbédät pөnjatiä Dios piäda'agaamby hawa'adstuum.

2 Tspcөxpä Diosmädia'agy hajxy nyajcөpcөöyyämät, ja'a hajxy tөө nmädóowämbä; jaduhñ hajxy nga'a tu'udägóoyämät.

²Haa ja'a Diosmoonsähajxiä, ja'a tsajpootypä, jéquiänä Diosmädia'agy hajxy yaa yajcädaacy hädaa yaabä naaxwiin. Tөyhajt ja'a Diosmädia'agy jaduhñ; pөnjaty ca'a cudiuumb, haxөөgtuum hajxy miähmө'öwa'añ.

³Mөjcuhdujtmөөдä Jesucristo. Hamdsoo hajxy je'e hoy xyhawaänäm neby hajxy nnähwäatsämät. Haa ja'a hajxy jayөbajt mädóowäbä, tөjiajt ja'a mädia'agy jaduhñ maa hajxy je'ejän. Mänit hөjts jaduhñ xyhawaandägájtsäm. Coö ja'a mädia'agy hajxy nga'a yajtuünämät, cab hajxy jaduhñ nnähwäatsämät. ⁴Madiu'u ja'a Dios

ja'a hijxtahñd tөө yajcähxө'ögy, ja'a hoy-yagjuөөñäjatypä; jaduhñ hajxy nmäbөjcämät coö ja'a miädia'agy tiөyhajtä. Tөө ja'a yhEspiritu hajxy xyajnäguéjxäm coö hajxy jaduhñ xpiuhbedäänäm mädyiijaty tuung hajxy xmiöoyyäm. Jaduhñä jioot chocy.

⁵Haa ja'a Dios mioonsähajxiä, ja'a tsajpootypä, cabä Dios jaduhñ tөө miäna'añ coö hajxy yhané'emät mänaa ja'a naaxwiimbä hänajty wyiimbida'añän. ⁶Jiiby jaduhñ myiñ cujaay maa ja'a Diosmädia'aguiän:

Dios, tiiguiөxpä ja'a jäya'ay
coo mjahmiejtsta'agy, coo mbuhbety.

⁷⁻⁸Maas mөc ja'a mmoonsä cuhdujt hijty tөө mmo'oy quejee ja'a jäya'ayhajxy.

Pero mänitä jäya'ay mөjcuhdujt mmooyy coö cөxiä yhané'emät tijaty miičh tөө mbäda'agy.

Jaduhñä Dios ja'a jäya'ay piäda'aga'añ mөj jaančh, coö jaduhñ ween wyiingudsähgө'öyii. Coö ja'a Dios jaduhñ hamdsoo miänaañ, jaduhñä tөyhajt hajxy nmөөdhájtäm coö ja'a mөjcuhdujt hajxy tөө xmiöoyyäm coö hajxy cөxiä nhanéhämät. Pero cajnä quiähxө'ögyñä coö hajxy cөxiä nhane'emäänäm. ⁹Jaduhñä Jesucristo, mänaa yaa yhitiän hädaa yaabä naaxwiin, cabä cuhdujt hijty jiaty mөөдä nebiä Dios mioonsähajxy miөөдän, ja'a hajxy tsajpootypä. Mänitä Dios miänaañ coö ja'a Jesucristo hajxy xnähho'túutämät nägөxiä, je'eguiөxpä coö ja'a Dios hajxy xchөjcäm. Coö ja'a Jesucristo

yho'cy, paadiä møj jaančh piädaacä, paadiä møjcu'ugong hoy quia'a miäjädaacy, jaayá'ayädsä mäjaa häxøpy møød coo yhané'emät.

¹⁰Paadiä Dios cøxiä wiinä piädaacy, weenä jäya'ayä Dios hajxy jaduhñ wyiingudsähgø'øy. Chojiä jioot jaduhñ coo ja'a yhuunghajxy jim yhidät nägøxiä maa je'ejan, pønjetiä miädia'agy mabójcäp. Y jaduhñä Dios miänaañ coo ja'a Jesucristo quimädówät ja'a höjtscøxpä. Jiaančh cudiuun je'eduhñ coo hajxy xñäho'túutäm.

¹¹Ja'a Jesucristo hajxy jaduhñ xyajnáhwáatsäm. Quipxiä Dios hajxy nDeedyhajtäm møødä Jesucristo. Paadiä Jesucristo hajxy xquia'a mädsähdiuunäm. Hix, hamdsoo miänaañ coo hajxy tu'ugpuhya'ay xmiøødhjätäm.

¹²Jaduhñ jiiby myiñ cujaay maa ja'a Diosmädia'aguian:

Nmøødmädia'agäämbiøch
nbuhya'ayhajxy ja'a
miichcøxpä.

Nguyhøwäämbiøch miich jim
tsajtøgooty, jim cu'ughagujc.

¹³Jaduhñ jiiby myiimbä:

Ni mänájøčhä Dios xquia'a
wiinhøñ, päadyhøch nga'a
tsähgø'øy.

Jaduhñ wiingtuum myíngumbä:

Chaačh nhity møødhøch
nhuunghajxy;

Diøshøch jaduhñ xmioooy.

¹⁴Pøn jaduhñ tu'que'ex, tu'ugjoot tu'ugnø'ty hajxy jaduhñ. Jaduhñä Jesucristo hajxy tøø xmiøødhjätäm tu'ugjoot tu'ugnø'ty mänaa yaa yhiätän hädaa yaabä naaxwiin. Paady hajxy jaduhñ xmiøødhjätäm, jaduhñ hajxy hñajty xñäho'tu'udáanam.

Jaduhñä møjcu'ugong hoy quia'a mäjädaacnä. Coo cu miäjädaacy, jaayá'ayädsä mäjaa häxøpy møød coo hajxy cu xyajtu'udägøoyäm.

¹⁵Coo ja'a Jesucristo miädia'agy hajxy nmabójcämät, cabä nho'og hajxy jaduhñ ndsähgøoyänät.

Pøn jaduhñ ca'a mabøj, je'eds ja'a yho'og tsähgøøby mädu'ñtiä jia jugyhaty.

¹⁶Coo ja'a Jesucristo yaa yhooy hädaa yaabä naaxwiin, ja'a Abraham yhap yhoc-hajxy yajnäguejxä, neby hajxy jaduhñ piuhbedøjät. Ca'a Dyiosmoonsähajxiä yajnäguejxä, ja'a tsajpootypä. Tøyhajt jaduhñ.

¹⁷Y paadiä Jesucristo yaa hoy jiäya'ayhaty neby höjtshjätäm; jaduhñ hajxy hoy xñähgapxtúutäm maa ja'a Diosän; jaduhñä nbojpä ngädieey hajxy hoy xñäho'túutäm.

Hojioot ja'a Jesucristo miøødhajpy. Pedyi jaduhñ quiudiuñ.

¹⁸Hoyä Jesucristo jia tsaächpøjcy, cabä møjcu'ugongä miädia'agy yajtuunäxä. Y coo ja'a møjcu'ugong hajxy hñajty xjia wi'i yajtu'udägoyyáanam, xpiuhbéjtäm ja'a Jesucristo hajxy jaduhñ je'eguiøxpä coo ja'a møjcu'ugong miädia'agy quia'a mabójcäxä ja'a Jesucristäm.

3 Hermanodøjc, tøø ja'a Jesucristo ja'a nbojpä ngädieey hajxy xyajnáhwáatsäm. Tøø ja'a Dios hajxy xyajnáhdjäm coo ja'a miädia'agy hajxy nmabójcämät. Tsøgä Jesucristo hajxy jahmiéjtsäm; høxtahm̄ds højts ja'a Dios yaa xyajnáguéjxäm. Jaduhñ hajxy njahmiéjtsämät coo hajxy jim xñähgapxtúutäm maa ja'a Dioswiinduumän. ²Haa

ja'a Moisésä, pedyii je'e jecy quiuduuñ maa ja'a Dios ja'a tiõjcän. (Je'eduhñ ñänøomby ja'a judiõshajxy.) Jaanä jaduhñä Jesucristo pedyii quiudiuumbä coo wyiinguejxä coo højts jaduhñ xñähgapxtúutämät. ³Maas hoy jaduhñ coo ja'a Jesucristo hajxy nwiingudsähgøøyyämät quejee ja'a Moisés. Høxtahmñsä tøjcojpä, je'eds jaduhñ wiingudsähgøøyyäp; cabä tøjc jaduhñ wyiingudsähgøøyyii. ⁴Cabä tøjc hamdsoo quiojy; häna'c jaduhñ cojpa. Pero ja'a Dios, cøxiä je'eduhñ piädaacy tijaty yaa hijp hädaa yaabä naaxwiin møødä jim tsajpootyp. ⁵⁻⁶Ja'a Moisés, jayøjpa tøyhajt jaduhñ miädiaactsohñ mädyii ja'a Dios hänajty cujecy quiapxtøwaamby. Pedyii ja'a Moisés quiudiuuñ maa ja'a Dios ja'a quiu'ugän. Pero cabä mõjcuhdajt miooyä nebiä Jesucristo miøødän. Hix, ja'a Jesucristo, ja'a Dios yhamdsoo Uung je'e. Y pedyii jim quiudiuuñ maa ja'a Dios ja'a quiu'ugän. Pero ja'a Moisés, jaduhñ je'e yhiyty nebiä moonsän. Coø hajxy hamuumdu'joot nmäbøjcämät, coo ja'a Jesucristo hajxy jootcujc njøbhíjxämät coo hänajty miejtstägatsa'añ, mänitä Dios hajxy nägøxiä xquiu'ugnäbøjcämät.

⁷Jaduhñ jiiby myiñ cujaay maa ja'a Diosmädia'aguiän:

Cooch nmädia'agy hajxy jäda'anäbaady xmiädóowät,

⁸⁻⁹hamuumdu'joot hajxy jaduhñ myajtúnät.

Haa ja'a jecyjiäya'ayhajxiä, ja'a mijts mhap mdeedyhajxiä, cábøch nmädia'agy hajxy jecy xyajtuunä, høyhøch

hijxtahñd may nja yajcähxø'cy, mänäajøch hajxy jecy nyajwädiñ pactuum juxychägui'xjomøjt.

Cooch nmädia'agy hajxy xquia'a mäbøjcä, páadyhøch hajxy nyajcumädooyy.

¹⁰⁻¹¹Xyagjootmadiägøøyyhøch hajxy je'e. Mänitøch nmänaañ:

“Tøø hajxy jaduhñ mdu'udägoonä. Cáboch nmädia'agy hajxy xyhabøgaanä.

Tøyhajt jaduhñ, cáboch mijts jim nyajmedsaannä maach mijts hijty nyajpoo'xa'añän.”

Jaduhñä Dioshèspiritu miänaañ maa ja'a Diosmädia'aguiän.

¹²Hermanodøjc, mnigwieendähadøøjäp hajxy nebiä Diosmädia'agy hajxy mga'a najtshixø'owät; jaduhñ hajxy mga'a tu'udägóyyät. Jujcy ja'a Dios; ca'a jiaduhñä nebiä jäya'ayhajxy yaabä Dyiohajpiän. ¹³Pero mäduhñtiä hajxy mjogyhaty, mniguiapxmøcpøgøøjäp hajxy jabom-jabom, neby hajxy jaduhñ mga'a tu'udägóyyät. ¹⁴Coo hajxy tehngajnä nmäbøjcämät, neby hajxy tøø nmäbøjtsóhñäm, mänitä Jesucristo hajxy jim xmiødhájtämät tsajpootyp.

¹⁵Jaduhñ jiiby myiñ cujaay maa ja'a Diosmädia'aguiän:

Coo ja'a Diosmädia'agy hajxy mmädóowät jäda'anäbaady, hamuumdu'joot hajxy myajtúnät.

Ja'a jecyjiäya'ayhajxy, cabä Diosmädia'agy hajxy jecy miäbøjcy.

¹⁶Jimä Moisés ja'a jäya'ay hoy wioobädsømy Egiptonaaxooty; je'eds hajxy jecy ca'a mabøjc ja'a Diosmädia'agy, hoy hajxy hänajty tøø jia mädooy. ¹⁷Je'eds hajxy hoy tiu'udägoonä. Jim hajxy hoy quiøxy ho'nä pactuum. Je'edsä Dios hoyhoy näjootmayhajt juxychägui'xjomøjt. ¹⁸⁻¹⁹Je'edsä Dios jaduñ nämaayy coo quia'a yajmedsaannä maa hijty jaduñ yajpoo'xa'añän, je'eguiøxpä coo hajxy hänajty quia'a mabøcy.

4 Tsøg hajxy nigwieendähajtäm; jaduñ hajxy nga'a tu'udägöoyämät. Coo hajxy ndu'udägöoyämät, cabä Dios hajxy jiiby xyajtägøoyämät maa hajxy xyajpoo'xa'añäm. Tøø hajxy hijty xyajwiinwaanøoyäm coo hajxy jiiby xyajtägø'owáañäm. ²Tøø ja'a Diosmädia'agy hajxy nmädóowäm nebiä jecyjiäya'ayhajxy jia mädooyän. Xiøøbä hajxy jaduñ jia nä'ä mädooyy, cab hajxy nä'ä mabøjcy. ³Højts, tøø højts nmabøjcäm, paadiä Dios hajxy jim xyajtägø'owáañäm maa hajxy xyajpoo'xa'añäm. Jimä Dios jaduñ näñøømy:

Cooch hajxy nnäjootmayhajty, päadyhöch hajxy nnämaayy:

“Tøyhajt jaduñ, cáboch mijts jim nyajmedsaannä maačh mijts hijty nyajpoo'xa'añän.”

Coo ja'a Dios ja'a naaxwiimbä yhädiuumbädøoyy, mänit jaduñ pioo'xnä. ⁴Jiiby jaduñ myiñ cujaay maa ja'a Diosmädia'aguiän:

Mänitä Dios hoy pioo'xnä ja'a miäjuxtujxøøbä, coo ja'a naaxwiimbä hänajty tøø yhädiuumbädøonä.

⁵Wiingtuumä Dios miänáangombä:

Cábøch hajxy nyajmedsaannä maa ja'a poo'xtaactän.

⁶Ja'a jecyjiäya'ayhajxy, ja'a Diosmädia'agy hajxy jayøbajt ja mädoowäbä, cab hajxy nä'ä yajtuuñ. Paady hajxy jim quia'a mejch maa ja'a poo'xtaactän. Pero näje'ejatiä jäya'ayhajxy miedsa'añ maa ja'a poo'xtaactän. ⁷Cujequiä Dios ja'a David yajmänaañ:

Coo ja'a Diosmädia'agy hajxy mmädówät jäda'anäbaady, hamuumdu'joot hajxy mmäbøgät.

Je'eduñ näñøømy coo hajxy jäda'anäbaady jim ndägøoyämät maa ja'a poo'xtaactän. ⁸Coo ja'a Josué ja'a judíoshajxy jecy wioomejch maa ja'a Palestinanaaxootiän, cabä poo'xtaact hajxy nä'ä paaty. Paadiä Dios jaduñ miäna'añ coo højts jäda'anäbaady ndägøoyämät maa ja'a poo'xtaactän. ⁹Jimnä ja'a poo'xtaact yhitynä maa ja'a Dios ja'a quiu'ughajxy tiägø'owa'añän. ¹⁰Pøñ jim tägøøby maa ja'a Dios ja'a pioo'xtaactän, jim jaduñ pioo'xaannä nebiä Dios pioo'xnän mänaa ja'a naaxwiimbä hänajty tøø yhädiuumbädøoyän. ¹¹Tsøgä Diosmädia'agy hajxy hamuumdu'joot mabøjcäm; jaduñ hajxy hoy ndägøoyämät maa ja'a Dios ja'a pioo'xtaactän. Cabä Diosmädia'agy hajxy nnajtshixøoyämät nebiä jecyjiäya'ay hajxy jiatcøoyän. Cab hajxy miabøjcy, paady hajxy jim quia'a tägøoyy maa ja'a poo'xtaactän.

¹²Ja'a Diosmädia'agy, tuumnä je'eduñ. Mäjaamøødnä je'eduñ.

Ja'a Dios hajxy xyajcähxó'cäm ja'a miädia'agyhaam pø nmøødhájtäm ja'a howyiinmahñdy hajxy, pø caj. ¹³Caj tii hayu'u'ch hamee'ch mnä'ägädä túnät. Tsipecxpä Dios ja'a nwiinmahñdyhájtäm hajxy nägøxiä xyhixyhájtäm neby hajxy njäya'ayhájtäm pø hoy, pø ca'a hoy. Pø cab hajxy hoy njäya'ayhájtäm, mänitä Dios hajxy haxøøgtuum xpiäda'agáanäm.

¹⁴Ja'a Jesucristo, ja'a Dioshuung, tøø jim quioody Dioswiinduum. Jim højts xñähgapxtúutäm. Paady, tsøgå Diosmädia'agy hajxy hamuumdu'joot panócxäm. Cabä wiinghäna'c hajxy pøn xñähgapxtúutäm jim Dioswiinduum.

¹⁵Najuøøbiä Jesucristo neby hajxy yaa ndsaaçhpójcäm hädaa yaabä naaxwiin. Hix, tøø je'e yaa jäya'ayhaty neby højts yaa njäya'ayhájtäm. Tøø jia yajtägoyya'añii ja'a mõjcu'ugóngäm, neby højts xjia wi'i yajtägoyyáanämbä. Pero cabä Jesucristo mänaa tiu'udägoy.

¹⁶Tsøgå Dios hajxy pa'yáaxäm hamuumdu'joot. Xchójcäm Dios hajxy. Miøødhajpiä hojiot je'eduhñ maa højtshájtäm. Xpiuhbéjtäm hajxy jaduñ coo højts tii nyajmaajiájtämät.

5 Ja'a teedywiindsøn_hajxy, ja'a hajxy jim tuumbä maa ja'a judíos chajtøjc-hajxiän, jaduñ hajxy piäda'agyii coo ja'a cu'ug hajxy ñähgapxtú'udät maa ja'a Diosän, møød coo hajxy cøxiä quiuyoxó'øwät, møød coo animal hajxy yóxät, weenä cu'ug ja'a piojpä quiädieey hajxy jaduñ ñähwa'açh quiuhwa'açh, ²⁻³møød weenä

yhamdsoo pojpä yhamdsoo cädieey ñähwaatsnä. Hix, jäya'ayhajp ja'a teedyhajxy neby højtshájtäm. Jimä piojpä quiädieeyhajxy je'ebä. Paady hajxy mee'xxieemy miägapy yhane'emy pønjaty ca'a najuøøby, pønjaty tu'udägooby.

⁴Cabä teedyhajxy hamdsoo nibiäda'agyii. Dios hajxy jaduñ pädaacp nebiä Aarón jecy piädaacän. ⁵Ni ja'a Jesucristo hamdsoo quia'a nibiädaacä nebiä teedywiindsønän. Ja'a Dios jaduñ pädaac. Jaduñä Dios ja'a Jesucristo ñämaayy:

Míichhöch jäda'a ndehñ
yHuunghadaamby.

⁶Wiingtuumä Dios jaduñ miänaañ: Cøjxta'axiøø miich mduna'añ teedy nebiä Melquisedec jecy tiuunän.

⁷Ja'a Jesucristo, mänaa yaa yhitiän hädaa yaabä naaxwiin, mänitä Dios møc pia'yaaxy. Jøøby hänäjty. Miänuu'xtaac ja'a Dios coo piuhbedøøjät mänaa hänäjty yho'oga'añän. Wyiingudsähgøøbiä Dios hänäjty je'e, paadiä miädia'agy miädóowäxä. ⁸Hoyyä Jesucristo jia Dioshuungä, quiudiuunä Tieedy miädia'agy coo chaachpøgät. ⁹Coo miee'xtujcy mänaa chaachpøquiän, xyajnahwáatsäm ja'a nbojpä ngädieeyhájtäm hajxy jaduñ pønjetiä miädia'agy mabójcäp. Cøjxta'axiøø hajxy hodiium xyaghidáanäm. ¹⁰Mänitä Dios ja'a Jesucristo piädaacy teedywiindsøn nebiä Melquisedec jecy tiuunän.

¹¹Madiu'u mijts hädaaduhmbä nja wi'i yajmøødmädia'aga'añ tsiipjaty, pero caj mijts mwiinjuø'øwa'añ. ¹²⁻¹³Tøø jegøøñä

mänaa ja'a Diosmädia'agy hajxy mmäbøjtsooñän. Hahixøøby hijty jaduñ coo wiinghäna'c hajxy myajnähixøøñät. Pero jaduñ mijts tøø mjaty nebiä naamdägø'øybän. Caj mijts ja'a Diosmädia'agy ja'a tsipjatypä mjada'añ. Je'enä hajxy mhabøcyñä ja'a cajpä chipjatiä. Cahnä hoguiuhdujt hajxy mhabøcyñä. ¹⁴Coo ja'a Diosmädia'agy hajxy hamuumdu'joot mgudiünät, mänitä tsipjatypä hajxy jaduñ mwijnjuø'øwät; y coo ja'a hoguiuhdujt hajxy tehngajnä mbanøcxät, mänit hajxy mnajuø'øwät mädyii hänajty hoguiuhdujt, mädyii hänajty haxøøgcuhdujt.

6 Tøø mijts ja'a mädia'agy mayhooc mmädoy ja'a Jesucristocøxpä, ja'a cajpä chipjatiä. Tøø hajxy mmädoy coo ja'a mhaxøøgcuhdujt hajxy mnajtshixø'øwät, coo ja'a Diosmädia'agy hajxy hamuumdu'joot mmäbøgät. ²Mnajuøøby hajxy tii hajxy coo tøø mnäbety, tii hajxy coo tøø mgø'øniñähgabyii. Jaduñ hajxy tøø mmädoy coo ja'a ho'ogyjiäya'ayhajxy jiuypipoga'añ, coo ja'a Dios ja'a haxøøgjäya'ayhajxy yajtsaaçhpoga'añ çøjxta'axiøø, coo ja'a naaxwiimbä wyiimbida'añ. ³Pero tsøgä Diosmädia'agy hajxy pedyii jaac habøjcäm, pø chojpiä Dios joot jaduñ.

⁴⁻⁶Pøñä Diosmädia'agy najtshixøøby, hoyyä Diosmädia'agy tøø jia wiinjuøøñä coo ja'a Jesucristo hajxy tøø xñäho'túutäm,

hoyyä piojpä quiädieey tøø jia yajnähwäatsäxä ja'a Jesucristäm, hoy tøø jia puhbedyíijäm ja'a Dioshespíritu, hoy jia najuø'øy coo ja'a Dios ja'a miäjaa quiexa'añ, coo ja'a Diosmädia'agy hajxy jaduñ najtshixø'øwät, cab hajxy hoy miäbøgaannä. Jaduñ hajxy yajcähxø'øgy coo ja'a Dioshuung hajxy yagho'tägach, coo hajxy ñäxi'igy hijxwiinduum. ⁷Pøñä Diosmädia'agy hoy cudiumb, quiumaabiä Dios jaduñ. Jaduñ mäwíinäts hajxy je'e nebiä hoñaaxän. Coo tiu'uy, mänit hotyijä jaduñ tiøømbety, tijaty tøø piäda'agyii, y quiunuu'xypä Dios jaduñ. ⁸Pøñ hoy ca'a cudiumb, haxøøgtuum jaduñ ñä'ä nøcxø'øwaambä. Jaduñ mäwíinäts je'e nebiä naax ca'a hoybän, maa haagä hapy tiøømbetiän. Ño'py hajxy jaduñ.

⁹Hermanodøjc, hoy mijts naamnä weenjaty tøø nja hadsähgø'øy, nnajuøøbiøch jaduñ coo mijts ja'a Dios jaanç tehñ yhoj xpiuhbeda'añ, je'eguiøxpä coo ja'a mbojpä mgädieey hajxy xyajnähwäatsä. ¹⁰Jaanch tehñ yhojjiäya'ay ja'a Dios jaduñ. Jiahmiechp jaduñ coo mijts hoy mgudiüñ, coo mijtsä hermanodøjc tehngajnä mbuhbety, je'eguiøxpä coo mijtsä Dios mjahmiech. ¹¹Jadúñhøch njoot chocy coo hajxy hoy mgudiünät mäduhñtiä hajxy yaa mjogyhaty hädaa yaabä naaxwiin. Mänit hajxy jim mnøcxät tsajpootyp nebiä Dios hajxy tøø xñäma'ayän. ¹²Cab hajxy mnänuuxø'øwät. Jaduñ hajxy mgudiünät nebiä jäya'ayhajxy jecy

quiudiuuñän, ja'a hajxy jim tøöbä ñöcxäbä tsajpootyp. Ja'a Dios jaduhñ yajwiinwaanøøyy coo hajxy jim ñöcxät, je'eguiøxpä coo ja'a Diosmädia'agy hajxy hänäjty hoy miäböcy tehngajnä.

¹³⁻¹⁴ Jéquiänä Dios ja'a

Abraham yajwiinwaanøøyy:

“Tøyhájthöch miich nbuhbeda'añ.

Nyajpu'uwáambiöch

nyaghi'igáambiöch miich.”

Hamdsoo cuhdujtcøxpä Dios jaduhñ miänaañ. Hiç, caj pøn møjcuhdujt miøödá nebiä Dios miøödan.

¹⁵ Yajtøjiajtä Dios jaduhñ nebiä Abraham yajwiinwaanøøyyän, je'eguiøxpä coo Abraham hänäjty tehngajnä miäböcy.

¹⁶ Ja'a Dioscøxpä jäya'ayhajxy hamuumdu'joot jaduhñ waambaty miäna'añ; y coo hajxy jaduhñ miäna'añ hamuumdu'joot, cab jaduhñ pøn waamb miänaañnä.

Tødiägøøby jaduhñ. ¹⁷ Paadiä Dios jaduhñ miänaañ: “Tøyhájthöch tøø nyajwiinwaanøø'öy coöch nbuhbeda'añ”, neby hajxy jaduhñ ñajuø'öwät coo hajxy tøyhajt piuhbeda'añii, coo ja'a Dios ja'a wyiinnmahñdy ni mänaa quia'a yajtägatsa'añ. Hamdsoo ja'a Dios jaduhñ miänaañ. ¹⁸ Jaduhñdsä tøyhajt hajxy nmøödhájtäm coo ja'a Dios ni mänaa quia'a høhñda'agy. Jaduhñdsä tøyhajt hajxy hoy nmøödhájtäm coo hajxy homiänaajä xpiuhbedáañäm coo ja'a miädia'agy hajxy nmäböjcamät. ¹⁹⁻²⁰ Jimä Jesucristo hajxy xñähgapxtüütäm tsajpootyp. Je'e jim tuumb teedywiindsøn nebiä Melquisedec jecy tiuñän. Cøjxta'axiøø ja'a Jesucristo jim

tiuna'añ tsajpootyp. Jaduhñä tøyhajt hajxy hoy nmøödhájtämät coo hajxy jim homiänaajä xyaghidáañäm.

7 ¹⁻² Coo ja'a Abraham ja'a reyhajxy hänäjty hoy tøø yagho'ogy, mänaa hajxy hoy chiptuñän, mäniä Melquisedec hoy miøödnijøjcubaadø'oyii. Mäniä Melquisedec miänaañ cooc ja'a Dios ja'a Abraham hänäjty piuhbeda'añ. Mäduhñtiä ja'a Abraham hänäjty tøø piaady maa hänäjty hoy tøø chiptuñän, majc-hit jaduhñ piädaacy tu'cuhdujtjaty. Mäniä Melquisedec piuhmooyy ja'a tu'hitpä. Mejtstu'u ja'a Melquisedec hänäjty tiuñ. Tøø ja'a Dios tsajpootypä hänäjty piäda'agy coo tiünät teedy. Y gobiernä hänäjty jim tiuumby maa ja'a cajpt xiøhatiän Salem. Jaduhñ miädia'agytiägø'öy coo hajxy jootcujc yhity. Jaduhñdsä Melquisedec xiø miädia'agytiägøöbiä coo hoy guiobiernähaty. ³ Cab jaduhñ pøn ñä'ägädä najuø'öy pønä Melquisedec tiajhajt tieedyhajt, pøn yhaphajt tieedyhajt. Cab jaduhñ pøn ñajuø'öy mänaa myiñ mänaa quiahy, mänaa yho'cy mänaa tiägooyy. Coo je'e tiuñ teedywiindsøn cøjxta'axiøø, jaduhñ mäwíinäts je'e tiuñ nebiä Jesucristo tiuñän, ja'a Dios yHuung.

⁴ Cähxø'p jaduhñ coo ja'a Melquisedec møjcuhdujt hänäjty jiaanç tehñ miøödá, je'eguiøxpä coo piuhmooyy ja'a tu'hitpä, mäduhñtiä ja'a Abraham hänäjty tøø piaady maa hänäjty hoy tøø chiptuñän. Y ja'a Abrahamä, mijts mhap mijts mdeedy je'eduhñ. ⁵ Y

ja'a Leví yhap yhoc-hajxiä, ja'a hajxy tuumbä teediä, jaduhñ jim myiñ maa ja'a jecyquihdujtän coo hajxy piuhmo'owøøjät ja'a tu'hitpä maa ja'a majc-hitcøxpän. Ja'a miägunaaxhajxy jaduhñ yégäp, hoyyä Abraham hajxy quipxy jia møødhaphaty jia møødteedyhaty. ⁶Pero ja'a Melquisedec, cabä Abraham hänajty jiujyhaty miägu'ughaty. Hawiing hänajty tiuñ teedy. Pero puhmooyyä je'e ja'a tu'hitpä. Ja'a Abraham jaduhñ yejc, ja'a Dios hänajty tøøbä yajwiinwaanø'øyäbä coo hänajty yajpu'uwa'añ yaghi'iga'añ. Mänitä Melquisedec ja'a Abraham ñämaayy coo ja'a Abraham hänajty piuhbeda'añijäm ja'a Diósäm. ⁷Y tøyhajt jaduhñ coo ja'a Melquisedec møjcuhdajt hänajty jiaančh tehñ miøødä. Cabä Abraham quihdujt hänajty miøjjä nebiä Melquisedec quihdujtän. Hiç, ja'a Melquisedec jaduhñ mänaañ coo ja'a Dios ja'a Abraham piuhbédät. ⁸Haa ja'a hajxy yaa tuumbä teedy jäda'anäbaadyñä, ho'p hajxy, hoyyä tu'hitpä hajxy jia puhmo'oyii ja'a majc-hitcøxpä. Haa ja'a Melquisedecä, jaanä puhmooyyä je'ebä, pero cabä Diosmädia'agy miäna'añ coo tøø yho'ogy. ⁹⁻¹⁰Hoyyä Levíhajxy hijty jia tuñ teedy, cabä quihdujthajxy hänajty miäbaady nebiä Melquisedec quihdujtän, je'eguiøxpä coo ja'a Abraham ja'a Melquisedec ja'a tu'hitpä hänajty tøø piuhmo'oy. Ja'a Abraham, je'edsä Levíhajxy hänajty yhaphajpy tieedyhajpy.

¹¹Pero ja'a teedyhajxy, ni mänaa hajxy xquia'a yajnähwäatsämät.

Paadiä Dios ja'a Cristo quiejxy coo je'e tiúnät teedy nebiä Melquisedec jecy tiuñän. Cabä tiuñ nebiä Aarónhajxy tiuñän. ¹²Coo ja'a Dios miänaañ coo ja'a Leví yhap yhoc-hajxy quia'a túunnät teedy, mänitä jecyquihdujt yajtägajtspä. ¹³Coo ja'a Dios ja'a Jesucristo yaa quiejxy, yajtägajts ja'a jecyquihdujt jaduhñ, je'eguiøxpä coo ja'a Jesús tiuñ teedy, hoyyä Leví quia'a ja haphaty quia'a ja teedyhaty. ¹⁴Hiç, ja'a Judä je'e yhaphajt tieedyhajt. Y cabä Moisés waamb miänaañ coo ja'a Judä yhap yhoc-hajxy tiúnät teedy.

¹⁵Y coo ja'a Jesucristo teedy tiuñ nebiä Melquisedec jecy tiuñän, cähxø'p jaduhñ coo ja'a Dios ja'a jecyquihdujt tøø yajtägajtsnä.

¹⁶Paadiä Jesús piädaacä teedy coo cøjxta'axiøø jiujyhada'añ. Cab jaduhñ yhity nebiä yaabä teedyhajxiän. ¹⁷Jaduhñä Dios ja'a Jesús ñämaayy:

Cøjxta'axiøø miičh mduna'añ
teedy nebiä Melquisedec jecy
tiuñän.

¹⁸⁻¹⁹Coo ja'a Moisés ja'a jiecycyquihdujt hajxy xquia'a yajnähwäatsäm, paadiä Dios jaduhñ miänaañ coo quia'a túunnät. Mänitä Dios ja'a Jesucristo yaa quiejxy coo hajxy hoy xyajnähwäatsämät. Mänitä Jesucristo hajxy jim xwioonøcxáanäm maa ja'a Dioswiinduumän.

²⁰⁻²¹Coo ja'a Dios ja'a Jesús piädaacy teedy, mänit miänaañ coo ja'a miädia'agy jiaančh tehñ tiøyhajtä. Jaduhñds jim myiñ cujaay maa ja'a Diosmädia'aguiän:

Ja'a Dios mänaaṅ coo
ja'a miädia'agy jiaančh
tehm̄ tiøyhajtä; cábägä
wyiinmahñdy mänaa
yajtägatsa'añ:

“Cøjxta'axiøø miičh mduna'añ
teedy nebiä Melquisedec
jegy tiuunñan”, nõmä Dios ja'a
Jesús ñämaayy.

Pero coo ja'a wiingteedy piädaacä,
cabä Dios waamb miänaañ.

²²Coo ja'a Jesucristo cøjxta'axiøø
yhida'añ, jaduñhä tøyhajt hajxy
nmøødhájtäm coo hajxy maas
hoy xyajñahwa'adsaanäm quejee
ja'a Moisés ja'a jecyquihdujt.
Cab hajxy je'e xyajñahwáatsäm.

²³Ja'a teedyhajxy hädaa yaabä
naaxwiimbä, coo hajxy yho'ogy,
mänit hajxy ñiguiuwichii. Paady
hajxy may tøø tiuunnä. ²⁴Pero cabä
Jesucristo mänaa yho'ogaannä.
Cøjxta'axiøø jaduñ tiuna'añ
teedy. Cabä wiinghäna'c ja'a tuung
jaduñ yajmämähmø'owa'añ.

²⁵Cøjxta'axiøø ja'a Jesucristo
yhida'añ. Hoy jiaančh
yajñahwa'adsaannä pønä jioot
tsojp coo ñähgapxtu'udøøjtät
ja'a Jesucristäm maa ja'a
Dioswiinduumän homiänaajä.

²⁶Coo ja'a Jesucristo jaduñ tiuñ
teedywiindsõñ, jaančh teh̄m̄ yhoy
hajxy jaduñ xñähgapxtútütäm. Ni
mänaa wiinghäna'c hajxy jaduñ
xquia'a nähgapxtútütäm nebiä
Jesúsän. Cabä Jesús tii pojpa tii
cädieey ñä'ägädä møødä. Ni pøn
jaduñ quia'a mäbaady nebiä
Jesúsän. Nhaagä møødhájtäm
pojpa cädieey hajxy. Jimä
Jesucristo yhiñnä tsajpootyp;
møjcuhdujt jim̄ miøød. ²⁷Haa

ja'a teedywiindsõñhajxy hädaa
yaabä naaxwiimbä, jabom-jabomä
animal hajxy yoxy. Jadúhñäc
tyijy ja'a piojpa quiädieey hajxy
ñähwa'ads quiuhwá'adsät, møødä
cu'ug pojpa quiädieeyhajxy. Jayøjp
hajxy yoxy ja'a yhamdsoo pojpa
yhamdsoo cädieeguiøxpä. Mänit
hajxy jiaac yoxy ja'a cu'ug pojpa
quiädieeguiøxpä. Pero cabä
Jesucristo animal mänaa yoxy. Hix,
tähooc jaduñ ñiñähdujcä coo
yho'cy. ²⁸Ja'a jecyquihdujt jaduñ
mänaamb coo ja'a jäya'ayhajxy
tiünät teedywiindsõñ, hoyyä pojpa
cädieey hajxy jia møødä. Mänitä
Dios cujegy miänaañ coo ja'a
Jesucristo tiünät teedywiindsõñ.
Ja'a tøyhajtä Dios jaduñ yejc coo
jaduñ miänaañ. Ni mänaa ja'a
Jesús pojpa cädieey quia'a møødä.

8 Hoorä, jadúhñhöch tøø
nmädia'agy coo ja'a Jesucristo
hajxy jim̄ xñähgapxtútütäm
tsajpootyp. Jim̄ jaduñ tiuñ
teedywiindsõñ. Hahooyhaamby
jim̄ yhäña'ay maa ja'a Diosän. ²Jim̄
tiuñ tsajpootyp maa ja'a tsajtøjc
hoybän, ja'a Dios yhädiuunäbä. Ca'a
jiäya'ayä je'e hädiuun. ³Haa ja'a
hajxy yaa tuumbä teedywiindsõñ
hädaa yaabä naaxwiinä, jaduñ
hajxy piäda'agyii coo animal
hajxy yóxät, coo hajxy cøxiä
wiinä quiuyoxø'owät. Jadúhñäc
tyijy ja'a piojpa quiädieey hajxy
ñähwa'ads quiuhwá'adsät. Y coo
ja'a Jesucristo jim̄ teedywiindsõñ
tiuñ tsajpootyp, paady jaduñ
ñiñähdujcä. ⁴Coo häxøpy yaa
yhity hädaa yaabä naaxwiin, cab
häxøpy tiuñ teedywiindsõñ. Haa
ja'a hajxy yaa tuumbä teediä,

je'eds hajxy cuyoxøoby nebiä jecyquihdujt yhane'emiän. ⁵Haa ja'a tsajtøjc yaabä maa hajxy tiüñänä, cab jaduñ miäbaady nebiä tsajtøjc jim tsajpootypän. Coö ja'a Moisés ja'a wittsajtøjc hänajty quioja'añ, mäniä Dios ja'a Moisés ñämaayy: "Tsipcøxpä wittsajtøjc jaduñ mgójät nébiøch jim nyaghixiän tunguhduum coö mnähguipxtú'udät." ⁶Tøø ja'a Dios ja'a hawiinjemybiä jajcuhducy coö hajxy jim xyaghidáanäm tsajpootyp cøjxta'axiøø. Haa hädaa hawiinjemybiä ja'a Dios jajcuhdujcabä, maas hoy je'eduhñ quejee ja'a Moisés jecy yéjcabä. Paadiä Jesucristo maas hoy tiuñ teedywiindsøn quejee ja'a teedyhajxy, ja'a hajxy hädaa yaabä naaxwiimbä. Ja'a Moisés jecy yéjcabä, cab hajxy jaduñ xjiaty puhbéjtäm nebiä hawiinjemybiän, ja'a jäda'ahatypän.

⁷Coö hajxy häxøpy xpiuhbéjtäm ja'a Moisés jecy jia yéjcabä, cabä Dios ja'a hawiinjemybiä häxøpy tøø ñä'a jajcuhducy. ⁸Cabä Dios ja'a jecyjiäya'ayhajxy quiumaayy je'eguiøxpä coö hajxy hoy quia'a cudiuuñ. Jaduhñ jim myiñ cujaay maa ja'a Diosmädia'aguiän:

Ja'a Dios jaduñ mänaamb:
Abaadaamb jaduñ
coöchä jäya'ayhajxy
nmøødyajcuhduga'añ ja'a
hawiinjemybiä,
ja'a hajxy jim tsänaabiä
judíos-naaxooty møød
Judábä-naaxooty.

⁹Maas hóyhøch jaduñ
nmøødyajcuhduga'añ
quejéjøch ja'a yhap

ja'a tieedyhajxy
nmøødyajcuhdujcän
mänáajøch hajxy jim
hoy nwoobädsømiän
Egiptonaaxooty.

Cab hajxy hoy ñä'a cudiuuñ
nébiøch nja jajcuhdujquiän.
Páadyhøch hajxy jaduhyyä
nnä'a nähgüecnä, nømä Dios
miänaañ.

¹⁰Coö jaduñ yhabáadät,
mäniätøchä jäya'ayhajxy
nmøødyajcuhduga'añ ja'a
hawiinjemybiä, ja'a hajxy jim
tsänaabiä judíos-naaxooty,
nømä Dios miänaañ.

Nyajnähiø'owáambiøch
nmädia'agy hajxy hoy, neby
hajxy hamuumdu'joot jaduñ
wyiinjuø'owät.

Mänitøch hajxy jaançh tehñ
yhoy xwyiingudsähgø'owa'añ.
Høøch hajxy ngu'ughadáannäp.

¹¹Nägøxiøchä nmädia'agy hajxy
xmiäbøgaanä ñämaj ñäbetiä.
Haagä mäbøgaamb hajxy
jaduhñ.

¹²Nyajnähwa'adsaanäbøch
ja'a piojpä quiädieey
hajxy. Cábøchä piojpä
quiädieeyhajxy mänaa
njahmiedsaanänä.

¹³Coö ja'a Dios miäna'añ coö ja'a
hawiinjemybiä tøø jajcuhducy,
jaduhñ miänaambä coö ja'a jecypiä
quia'a tsoobaatnä, coö quia'a
tunaannä.

9 Jaduhñä jecyquihdujt
myiimbä mädyii ja'a
jäya'ayhajxy quiudiünäp maa ja'a
chajtøjc-hajxiän. ²⁻³Jaduhñdsä
wittsajtøjc hajxy jecy yhädiuñ.
Coö ja'a wit hajxy yaghadøødiujcy,

metscä cuarto jaduñ hoy miähmø'øy. Tu'nax hoy møj miähmø'øy; ja'a cujpä muutsc hoy miähmø'øy. Ja'a cuarto möjpä, je'eduhñ xøhajt “cunuu'xytiøjc”; jiiä ceratoyøñdy hajxy yaghijty møødä meexä maa ja'a cunuu'ychajcaagy hajxy hñajty yujcoñän. Ja'a cuarto muutspä, je'eduhñ xøhajt “cunuu'xytiøjc maa ja'a Dios yhäña'ayän.” ⁴Ja'a orohaltar jii by hijt maa ja'a poom hajxy hñajty jioquiän, møødä cuhdujtcajä; oronähwopy hñajty je'e. Jii by cajäooty ja'a orotu'ts yhiyty maa ja'a manä hajxy hñajty yaghitiän. Ja'a manä, je'edsä tsajcaagy hñajty xiøhaty ja'a Dios jecy quiéjxäbä. Jiiä Aarón ja'a quiuhdajt yhiypä ja'a jecy wáamäbä. Jiiä tsa yhiypä maa ja'a Dios ja'a cuhdujt jecy yuugjahyyän. ⁵Cajänähgøxpä querubín yhädiuunnaxyhajxy yhiyty “maa ja'a Dios yhäña'ayän.” Jimä quieecthajxy quiäjøjna'ay “maa ja'a Dios pojpä cädieey miee'xiän.” Cábøch ngapxtøwa'añ nebiaty hädaaduhmbä hijty tiuñ.

⁶Coo ja'a wittsajtøjc hajxy hñajty tøø quiojnä, mänitä teedyhajxy jii by tiägøøchöñnä maa ja'a möjcunuu'xytiøjcän. Jii by hajxy jabom-jabom tiuunnä. ⁷Pero jii by maa ja'a muutscunuu'xytiøjcän maa ja'a Dios hñajty yhäña'ayän, jagooyä teedywiindsøn hijty jii by tiägø'øy. Tähoöquiä hajxy hijty jii by tiägø'øy ja'a tu'ugjomøjtpä. Coo hajxy hñajty jii by tiägø'øwa'añ, jayøjpä animal hajxy hijty yagho'ogy. Mänitä animalnø'ty hajxy hijty jii by nøcxy quiuyoxø'øy

muutscunuu'xytiøgooty, ja'a piojpä quiädieeguiøxpähajxy, møødä cu'ugä piojpä quiädieeguiøxpähajxy. ⁸Jaduñä Dioshespíritu hajxy xyajwiinjuøøyyäm coo hajxy hoy nga'a tägøøyyämät maa ja'a Dioswiinduumän mäduhñtiä ja'a jecyquihdujt hajxy yajtuññä. ⁹Jaduñ hajxy jäda'anäbaadyñä nhíjtäm. Je'enä animal hajxy yoxy; je'enä hajxy cøxiä wiinä quiuyoxø'øy. Paady hajxy jaduñ quiuhdujthatyñä, jaduhñac tyijy ja'a Dios jiaanč tehñ quiumay. Cab hajxy jaduñ nähwa'ačh quiuhwa'ačh, hoy hajxy jaduñ jia cuhdujthatyñä. ¹⁰Jagooyä ja'a quiuhdujthajxy yhane'emy tijaty hajxy quiáyäp yhú'ugäp, neby hajxy ñibiuj ñijie'edsøøjät, neby hajxy yaa jiäya'ayhädat hädaa yaabä naaxwiin. Pero yø'ø cuhdujt jaduñmbä, cab jaduñ tiuunnä. Tøø ja'a Dios ja'a hawiinjemybiä yajcuhdujnä, mädyii jaduñ tunaamb.

¹¹Mänitä Jesucristo hajxy hoy xjiaanč tehñ yajnähwäatsäm. Jaaya'ay jaduñ túunnäp teedywiindsøn jim tsajpootyp maa ja'a tsajtøjc jaanč tehñ yhoybän. Ca'a jiäya'ayä hajxy hädiuun hädaa yaabä naaxwiimbä. ¹²Tøø ja'a Jesucristo jim tiägø'øy maa ja'a Dioswiinduumän ja'a tähoötagø'øyyä. Hamdsoo hñajty tøø ñiñähdugyii coo højts hñajty xñähho'tu'udáañäm. Cabä tii nø'ty quiuyoxøøyy maa ja'a yaabä tsajtøjcän nebiä yaabä teedyhajxy quiuhdujthatiän coo chivo hajxy yoxy, coo waj hajxy yoxy. Coo ja'a Jesucristo hajxy tøø xñähho'túütäm,

paady hajxy jim nhidáanäm
Dioswiinduum cõjxta'axiõõ.

¹³Jaduhñä jäya'ayhajxy
quiuuhdujthaty, coo hajxy yho'ogõ'õy,
mänitä chivonõ'ty wajnõ'ty
hajxy yajniñähxänicxyii. Mänitä
wajcujiaam hajxy yajniñähwõjyii,
ja'a hajxy hänäjty tõõ

ñäno'ogõ'õyábä maa ja'a altarän.
Jaduhñ hajxy ñiyajñähwa'açhii.

¹⁴Hoorä, ja'a chivonõ'ty, ja'a
wajnõ'ty, cabä pojpä cädieey mänaa
yajñähwa'açh. Ja'a Jesucristo
hajxy jaduhñ xyajñähwáatsäm
mänaa hajxy xñähho'túutäm. Cabä
Jesucristo tii pojpä cädieey miõõdä.
Cab jaduhñ mänaa yho'ogaannä.

Hamdsoo jim ñiñähdujca
maa ja'a Dioswiinduumän.

Jaduhñä nhaxõõgcuhdujt
hajxy xyajñähwáatsäm, nebiä
Diosmädia'agy hajxy jaduhñ maas
hoy nmäbõjcamät.

¹⁵Coo ja'a Dios ja'a hawiinjemybiä
tõõ yajcuhdujty, paadiä Jesucristo
hajxy xñähho'túutäm, pønjatiä Dios
jaduhñ wyiimbiiw. Xyajñähwáatsäm
ja'a nbojpä ngädieey hajxy nebiaty
hajxy tõõ njäya'ayhãjtäm maa
ja'a jecypiä yhiytiän. Y jim hajxy
xyajñõcxáanäm tsajpootyp nebiä
Dios hajxy xyajwiinwaanõõyyäm.

¹⁶⁻¹⁷Homiädyii testamentänoquiä,
cahnä tiuungpaadyñä, jugyhajpnä
jaaya'ay jaduhñ. Coonä yhõ'ogät,
mänitnä ja'a nocy tiuungpaada'añ.

¹⁸Paadiä Dios jaduhñ miänaañ coo
animal hajxy yõxät, mänaa ja'a
jayõbhajtpä yajcuhduquiän. ¹⁹Coo
ja'a Moisés ja'a cu'ugä jecyquiuuhdujt
hänäjty tõõ quiõxy mo'oy, mänitä
wajhuung yojxy mõõdä chivohuung.
Mänitä ñõ'ty hoy ñõõdemõõyyä.

Mänitä tsaptsmeegpõjt hoy
piäda'agy nõ'ñõõjooty mõõdä
hisopohaa'x. Mänitä cu'ug ja'a
nõ'ñõõ yajñähxänicxy mõõdä
jecyquiuuhdujtsaa. ²⁰Mänitä
Moisés miänaañ: “Haa hädaa
nõ'tiä, hijxtahnd hädaaduhñ coo
mijtsä Dios xmiõõdyajcuhdujcy.”

²¹Mänitä Moisés ja'a wittsajtõjc
ja'a nõ'ñõõ hoy yajñähxänicxpä
mõõd tijaty hajxy jiiby yajtuumbj
mänaa ja'a Dios hajxy hänäjty
wyiingudsähgõ'õyän. ²²Jaduhñä
jecyquiuuhdujt hijty yhane'emy
cooc õxiä ñähwa'açhii nõ'tyaam.
Coogä animal hajxy quia'a yõxät,
cábägä piojpä quiädieey hajxy ñä'ä
nähwá'adsät.

²³Haa ja'a wittsajtõjc hädaa yaabä
naaxwiimbä, mõõd tijaty jiiby hijp
tsajtõgootiä, animalnõ'tyaamä
Moisés yajñähwaach. Pero
hõjtshãjtäm, ni mänaa ja'a
animalnõ'ty hajxy xquia'a
yajñähwáatsämät. Paadiä Jesucristo
hajxy hoy xñähho'túutäm, jaduhñ
hajxy nnähwáatsäm. ²⁴Tõõ ja'a
Jesucristo jim tiägõ'õy maa ja'a
Dioswiinduumän. Jim hajxy
xñähgapxtúutäm. Ca'a yhädaa
yaabä tsajtõgootiä tiägõõyy. Haa
ja'a tsajtõjc yaabä, cab jaduhñ
tiehñ miäbaady nebiä tsajtõjc
jim tsajpootypän. ²⁵⁻²⁶Haa ja'a
teedywiindsõñ hädaa yaabä
naaxwiimbä, jomõjt-jomõjt
jiiby tiägõ'õy maa ja'a
muutsunuuxyitiõjcän. Jiibiä
animalnõ'ty nõcxy quiuyoxõ'õy.
Pero ja'a Jesucristo, tähooquiä
yho'cy. Cabä Dios jaduhñ miänaañ
coo mayhooc yhõ'ogät. Coo
yhabaaty, mänitä Jesucristo

hajxy hoy xñähho'túutäm ja'a nbojpä ngädieeyhajtäm. ²⁷Ja'a Dios hajxy xquiunúu'xäm xpiädáacäm coo hõjts tähooquiä nho'ogáanäm. Mänitä Dios hajxy xyajtøyhajtyegáanäm. ²⁸Jaanä tähooquiä ja'a Jesucristo hajxy xñähho'túutämbä ja'a nbojpä ngädieeyhajtäm. Tähoocyajnáhwa'achä hajxy xyajnáhwaats xyajcuhwáatsäm. Coo jadáhooç quiädaactägatsa'añ, mänit hajxy jim xyajnöçxáanänä maa ja'a Dioswiinduumän, põnjaty hänäjty jaduhñ jii jøbhijxp.

10 Haa ja'a jecyquihdujt, hijxtahñd hänäjty jaduhñ hijp coo ja'a Jesucristo hajxy hänäjty xñähho'tu'udáanäm. Nebiä jecyquihdujt hänäjty yhane'emiän, jomøjt-jomøjtä animal hajxy jia yoxy. Pero ni põñ hänäjty quia'a nähwa'ach quia'a cuhwa'ach, põnjaty hänäjty ja wi'i tiägø'owáambäp maa ja'a Dioswiinduumän. ²Coo hajxy häxøpy tøø jiaanç nähwa'ach tøø jiaanç cuhwa'ach ja'a piojpä quiädieey hajxy, cabä animal hajxy häxøpy yojxnä. Tähooquiä hajxy jaduhñ cu yojxy, mänit jaduhñ cu yhojøøyy. Hamdsoo hajxy cu ñajuøøyy coo pojpä cädieey hajxy quia'a møødänä. ³Pero coo animal hajxy hänäjty jaduhñ yoxyñä jomøjt-jomøjt, ñajuøøby hajxy hänäjty jaduhñ coo pojpä cädieey hajxy miøødä. ⁴Hix, ni mänaa ja'a wajnö'ty ja'a chivonø'ty ja'a pojpä cädieey quia'a yajnáhwa'ach quia'a yajcuhwa'ach.

⁵Paadiä Cristo ja'a Dios ñämaayy, mänaa hänäjty jaduhñ yaa tøø

quiäda'aguiän hädaa yaabä naaxwiin:

Caj miich mjoot jaduhñ chocy coo ja'a animal hajxy tehngajnä yóxät.

Páadyhöch miich yaa xquiejxy hädaa yaabä naaxwiin cooçh yaa njäya'ayhádät, nébiøçhä jäya'ayhajxy jaduhñ yaa nnähho'tú'udät.

⁶Caj miich mjoot jaduhñ chocy coo animal hajxy yóxät, coo hajxy ñó'ogät.

Paadiä animal hajxy yoxy, nähwaatspä piojpä quiädieeyhajxy jaduhñ.

⁷Mänitøch nmänaañ:

“Dios, páadyhöch jaduhñ yaa tøø ngäda'agy nébiøch jaduhñ yaa ngudiúnät nébiøch miich xñämaayyän, neby jaduhñ jim myiñän cujaay maa miich mmädia'aguiän ja'a høøçhcøxpä”,

nømä Cristo ja'a Dios ñämaayy.

⁸Jayøjpä Cristo miäna'añ cooc ja'a Dios jioot quia'a tsoçy coo animal hajxy quia'a yóxät ni quia'a nó'ogät. Ja'a piojpä quiädieey hajxy jaduhñ yajnáhwáatsäp yajcuhwáatsäp. Hoyyä jecyquihdujt jia hane'emy coo hajxy tehngajnä yóxät, cabä Dios jaduhñ quiumay. ⁹Jaduhñ miänáangombä: “Teedy, páadyhöch yaa tøø ngäda'agy nébiøch jaduhñ yaa ngudiúnät nébiøch miich xñämaayyän.” Jaduhñ miädia'agytiägø'øyy coo ja'a Cristo hänäjty jaduhñ yhane'ema'añ coo animal hajxy quia'a yójxnät, nebiä Tiedy miädia'agy jaduhñ quiudiúunät. ¹⁰Hoyyä Jesucristo ja'a Tiedy miädia'agy jiaanç

cudiuunä coo hõjts jaduñ
tähooquiä xñähho'túutäm;
paadiä Dios hajxy xyajñähwaats
xyajcuhwáatsäm.

¹¹Jaduhñä jecyquihdujt hijty
yhane'emy coo ja'a teediä animal
hajxy jabom-jabom wyi'i yóxät.
Hoy hajxy jaduñ jia cudiuun, cab
hajxy jaduñ ñä'ägädä nähwaach
ñä'ägädä cuhwaach. ¹²Coo ja'a
Jesucristo ja'a nbojpa ngädieey
hajxy hánajty tøø xñähho'túutäm
tähooquiä, mänit hoy

yhänaaguiäda'agy maa ja'a Dios
yhahooyhaampiän. ¹³Jim jaduñ
yhahixy coo ja'a miädsiphajxy
quia'a mäjäda'aga'añ. ¹⁴Tähooquiä
hajxy tøø xñähho'túutäm.

Jaduhñä nbojpa ngädieey hajxy
xyajñähwaats xyajcuhwáatsänä.
¹⁵Jaduhñä tøyhajt hajxy
nmøødhájtäm coo tiøyäy,
je'eguiøxpä coo ja'a Dioshespíritu
jaduhñ miänaambä maa jaduñ
cujaay myiñän:

¹⁶Coo jaduñ yhabaadät,
mänítöch hajxy
nmøødyajcuhduga'añ, nõmä
Dios miäna'añ:

Nyajñähixø'owáambjöch
nmädia'agy hajxy hoy, neby
hajxy jaduñ hamuumdu'joot
wyiñjuø'owät.

¹⁷Mänit miänáangombä:

Cáböchä piojpa quiädieeyhajxy
mänaa njahmiedsáanänä.

¹⁸Jaduhñds je'e, tøø ja'a Jesucristo
ja'a nbojpa ngädieey hajxy
xyajñähwaats xyajcuhwáatsänä
tähooquiä. Hoyyä animal hajxy jia
yoxyñä, cab jaduñ choobaatnä.

¹⁹⁻²⁰Hermanodøjc, maa ja'a
jecyquihdujt myiñän, cabä cuhdujt

pøn miøødä coo jiiby tiägø'owät
maa ja'a muutscunuu'xytiøgootiän.

Pero coo ja'a Jesucristo hajxy
tøø xñähho'túutäm, paady
hajxy jim hoy ndägø'owáanänä
maa ja'a Dioswiinduumän. Tøø
hajxy xyajñähwaats tøø hajxy
xyajcuhwáatsäm ja'a nbojpa
ngädieeyhájtäm. ²¹Je'eds hajxy jim
xñähgapxtúutäm Dioswiinduum.

²²Entonces, tsøg hajxy jim
tägøøyyäm Dioswiinduum. Tsøgä
miädia'agy hajxy hamuumdu'joot
mäbøjcäm coo ja'a cuhdujt hajxy
nmøødhájtäm coo hajxy jim
ndägøøyyämät, je'eguiøxpä coo ja'a
Jesucristo hajxy tøø xñähho'túutäm.
Jaduhñä nbojpa ngädieey hajxy tøø
xyajñähwaats tøø xyajcuhwáatsäm.

²³Tsøgä Diosmädia'agy hajxy
tehngajnä mäbøjcäm. Cab hajxy
nnajtshixøøyyämät. Nmøødhájtäm
ja'a tøyhajt hajxy jaduñ coo ja'a
Dios hajxy xmio'owáanäm nebiaty
hajxy tøø xyajwiinwaanøøyyäm coo
hajxy cøxiä wiinä xmio'owáanäm.

²⁴Tsøg hajxy niguiapxwíjjäm
neby hajxy maas hoy nniçhoje
nnibia'häyøowämät hamiñ haxøpy,
neby ja'a Diosmädia'agy hajxy
jaduhñ maas hoy ngudiúunämät.

²⁵Jaduhñ hajxy nyajñajuøøyyäm
coo miäwiingoönä coo ja'a
Jesucristo yaa quiädaactägatsa'añ.
Paady, tsøg hajxy

nijjootcapxmøpcøjcäm. Tehngajnä
hajxy nhamugøøyyämät ja'a
Dioscøxpä. Naje'e hajxy, cab hajxy
jaduhñ ñä'ägädä mejtsnä. Cabä
quihdujthajxy jaduñ yhooyä.

²⁶Coo hajxy tehngajnä haxøøg
nwädíjtämät, hoyyä tøyhajt hajxy
tøø nja wiinjuøøyyäm, cabä nbojpa

ngädieey hajxy jaduhñ nã'ägädä nãhwáatsámät. ²⁷Haxøøgtuumä Dios hajxy jaduhñ xpïädáacámät maa ja'a jøøn tiöyyän, maa ja'a Dios miädsiphajxy yhiitiän. Hočhähgøøñä jaduhñ jiiby. ²⁸Pøn jaduhñ ca'a cudiuumb nebiä Moisés ja'a jecyquihdujt yhane'emiän, pø tøø testigohajxy jaduhñ yhixy mejstägøøgä, tsipcøxp jaduhñ yagho'oga'añii. ²⁹Maas hanaxiä hajxy jaduhñ quiumädowaannä pønjaty ja'a Dioshespíritu jaduhñ haxøøg nänøømb, ja'a mayhajt tuumbä, pønjetiä Dioshuung jaduhñ xøøghajp, pønjetiä ñø'ty jaduhñ häyoowhíjxäp, hoy hajxy je'eduhñ tøø xjia nãhho'túutäm, hoy hajxy je'eduhñ tøø xjia yajnãhwaats tøø xjia yajcuhwáatsäm. ³⁰Tøyhajtä Dios jaduhñ miänaañ: "Høøčh jaduhñ nyaghawiimbidaamby." Chaadsä Diosmädia'agy miänáangumbä: "Dios quiu'ug jaduhñ yajcumädowaambä." ³¹Hočhähgøøñä jaduhñ coo ja'a Dios hajxy xyajcumädóowämät; je'eduhñ jugyhajp cøjxta'axiøø. ³²Naxy hajxy mdehm jiahmiédsät nebiä Jesucristo miädia'agy hajxy mmädoodsohnän. Hamuumdu'joot hajxy mbadu'ubøjcy, hoy hajxy hãnjty mja tsaächpøcy hoyhoy. ³³Nãje'e hajxy myaghäyoowhijxy cu'ughagujc. Y mjootcapxmøcpøjpy hajxy hãnjty pønjaty hãnjty jaduhñ häyoowhíjxäp. ³⁴Y mnäxuu'chp hajxy hãnjty pønjaty hãnjty tsumyčhãnaaby. Mxoondaacp hajxy hãnjty, hoy hajxy cøxiä wiinä xjia pøjcä. Mnajuøøby hajxy hãnjty coo hajxy jim mhida'añ tsajpootyp

cøjxta'axiøø. ³⁵Entonces, cab hajxy tii mdájät mmáyät; tehngajnä hajxy mmäbøgät coo ja'a Dios hajxy xyhixyñä. Mjahmiédsäp hajxy jaduhñ coo hajxy nøcxy jim mhidaannä tsajpootyp. ³⁶Naxy hajxy mdehm miee'xtügät, nebiä Diosmädia'agy hajxy jaduhñ hoy mgudiúnät. Jaduhñ hajxy mbáadät tijaty ja'a Dios hajxy tøø xyajwiinwaanøøyyäm coo hajxy xmio'owáanäm. ³⁷Jaduhñä Diosmädia'agy miäna'añ:

Mobädajpä je'e quiäda'aga'añ pønä Dios jaduhñ quiexaamby.

³⁸Pønä Diosmädia'agy hoy cudiuumb, miäbøjpy je'eduhñ tehngajnä.

Pero coo ñajtshixø'owät, cabä Dios quiumayaannä.

³⁹Pero højtshajtäm, cab hajxy mänaa nnajtshixø'owáanäm. Tehngajnä hajxy nmäbøjcam. Paadiä Dios hajxy xyhuuc yajnãhwa'adsáanãmbä. Cab hajxy xyajcumädowáanäm.

11 Coo hajxy nmäbøjcam, mãnitä tøyhajt hajxy nmøødhajtäm coo hajxy nbaadãanäm mädyijjaty hajxy njøbhíjxäm, hoy je'eduhñ quia'a ja cãhxø'ogyñä. ²Ja'a jecyjiäya'ayhajxy, coo hajxy miäbøjcy, paadiä Dios quiumaayy.

³Coo hajxy nmäbøjcam, jaduhñ hajxy nyajnajuøøyyäm coo ja'a Dios ja'a naaxwiin yajwa'añguiojy ja'a miädia'agyhaam, møødä madsa'a, møødä po'lo, møødä xøø.

⁴Coo ja'a Abel jecy miäbøjcy, paadiä Dios quiumaayy. Hix, hoyyã Abel quiudiuun coo animal yojxy ja'a Dioscøxpä. Ja'a Caín,

caj quiumaayyá je'eguiøxpä coo hänäjty quia'a mäbøcy. Hix, cabä animal vojxy. Hoy jaduħn coo ja'a Abel hajxy nbahíxämät, hoy jecy jia yagho'cä. Hix, miäbøjc ja'a Abel.

⁵Coo ja'a Enoc jecy miäbøjcy, paadiä Dios quiumaayy. Cabä Enoc nã'ä ho'cy. Jaduhyyä Dios yajnøcxy tsajpootyp. Jaduhñ jim myiñ cujaay maa ja'a Diosmädia'aguiän. ⁶Coo hajxy nga'a mäbøjcämät, cabä Dios hajxy xquiumáayyämät. Tsipcøxp hajxy nmäbøjcämät coo ja'a Dios tiømiädia'agy. Y jaduħn hajxy nmäbøjcämät coo ja'a Dios piuhbeda'añ pønä Dios wiingudsähgø'owaamb.

⁷Coo ja'a Dios ja'a Noé jecy nãmaayy coo ja'a nøøgomdägoy ja'a naaxwiin hänäjty quiøxy wiinyeegø'øwa'añ, mäniä Noé ja'a Dios miädia'agy jaduħn quiuidiuunä, hoyyä nøøgomdägoy hänäjty quia'a ja cähxø'øgyñä. Mäniä barco cruundä yhädiuunä. Jiibiä Noéhajxy choocy møødä yhuung møødä tio'oxy. Coo ja'a Noé jaduħn miäbøjcy, paadiä Dios jiaanč tehñ quiumaayy. Pero ja'a wiinghäna'c-hajxy, cab hajxy miäbøjcy. Paady hajxy øjx quiuhdägoy.

⁸Coo ja'a Dios ja'a Abraham jecy nãmaayy coo jim choonät nãaxooty, coo jäguemnaax ñøcxät maa ja'a Dios ja'a Abraham yajñhdijjiän coo chänaadiaacpøgät, miäbøjc ja'a Abraham jaduħn. Mäniä jim jiaanč tsoħñnä nãaxooty. Nä'ä nägoobä nã'ä tu'ubøjnä. Cab hänäjty ñajuø'øy maa ñøcxät.

⁹Coo ja'a Abrahamhajxy jim miejch maa ja'a Dios hänäjty tøø

yajñhdijjiän, cab hajxy tieħm chänaadiaacpøjcy, je'eguiøxpä coo hänäjty jiäya'añaaxootiä. Wittøgooty hajxy hänäjty chäna'ay. Pero miäbøjpiä Abrahamhajxy hänäjty coo ja'a naax hajxy hänäjty mio'owa'añii, neby hajxy hänäjty tøø yajwiinwaanø'øyijän ja'a Diósäm. Jaduhñä Abraham yhuung Isaac nãmáayyabä møødä yhoc-huung Jacob. ¹⁰Hix, ñajuøøbiä Abrahamhajxy hänäjty coo hajxy hänäjty jim ñøcxa'añ tsajpootyp Dioswiinduum. Cab hajxy hänäjty tiajy miay coo ja'a naax hajxy quia'a tsoj mooyyä.

¹¹Jaanä jaduħñä Sara jecy miäbøjpä. Tøø hänäjty miäjaanä mänaa ja'a Dios hoy piuhbetiän coo maaxhuung piädät. Y jaanč huungpaat ja'a Sara jaduħn je'eguiøxpä coo miäbøjcy nebiä Dios hänäjty tøø yajwiinwaanø'øyän. ¹²Y ja'a Abrahamä, hoy hänäjty tøø jia mäjaanä, møjjøøyy mayøøyy je'eduhñ. Tøø ja'a yhap yhoc-hajxy jaduħn jiaanč tehñ miayøøñä. Cab hajxy jaduħn hoy yajmäčhowa'añ. Jaduhñ hajxy miayyä nebiä madsa'ajän, nebiä tsabiu'ujän.

¹³Coo ja'a Abrahamhajxy yho'cy, cahnä hajxy hänäjty quiøxy paadyñä mädyijjatiä Dios hänäjty tøø yajwiinwaanø'øy. Pero miäbøjc hajxy jaduħn. Ñajuøøby hajxy hänäjty coo hajxy hänäjty jim ñøcxa'añ tsajpootyp. Paady hajxy xioondaacy. Ñajuøøby hajxy hänäjty coo hajxy hänäjty nä'ä nägoobä wiädityñä. ¹⁴Pønjaty jaduħn wädiip, cahnä tsänaadiaact hajxy piadyñä. ¹⁵Coo ja'a jioothajxy cu chojcy, cu wyiimbijty hajxy, cu ñøcxtägajch

hajxy je'e maa hajxy hānajt̃y t̃õo yhuuc tsohm̃bān. ¹⁶Pero jim̃ā j̃ioot hajxy hānajt̃y hamuumdu'joot t̃õo piāda'agy tsajpootyp maa ja'a chānaadiaacthajxy hānajt̃y t̃õo yhahix̃õoyyāxān. Ja'a Dios jaduh̃n hahix̃õoyy. Cabā Dios miādsāhdiuuñ ja'a Abrahamhajxy.

¹⁷⁻¹⁸Coo ja'a Dios ja'a Abraham yhaneh̃my coo yhuung yóxāt, ja'a Isaac-hajpā, miābøgaambiā Abraham hānajt̃y je'eduh̃n, hoy ja'a yhuung hānajt̃y jia tu'uquiā, hoyyā Dios hānajt̃y t̃õo jia māna'añ: “Møj̃ø'owaamb mayø'owaamb miich̃ mhuung ja'a Isaac-hajpā.” Nā'ā joodhijx̃ ja'a Dios ja'a Abraham jaduh̃n pø jiaanč̃ cudiunaamby hānajt̃y jaduh̃n. ¹⁹Miäbøjpiä Abraham hānajt̃y coo ja'a yhuung hānajt̃y yagjujyipiøgānāxā ja'a Diósām. Mānitā Dios miānāangombā coo ja'a yhuung quia'a yaghó'ogāt. Jaduh̃n māwīnāts̃ ja'a Isaac hoy jiaty nebiā jadāhooc t̃õo jiujujyipiøquiābān.

²⁰Coo ja'a Isaac miäbøjcy, paadiā Jacob nāmaayy møødā Esau coo ja'a hoybā ja'a weenbā hajxy piaada'añ. ²¹Coo ja'a Jacob miäbøjcy, paadiā yhoc-huunghajxy nāmaayy coo ja'a hoybā weenbā hajxy piaada'añ. Ja'a José yhuunghajxy je'e. Mānitā Jacob ja'a Dios wyiingudsāhgøoyy. Cuhdajtcøxp̃ hānajt̃y ñiguiuhdiyjii. Ho'ogānnap̃ hānajt̃y je'eduh̃n. ²²Coo ja'a José miäbøjcy, ñajuøoyy jaduh̃n coo yhap yhoc-hajxy hānajt̃y jim̃ cujcy choona'añ Egiptonaaxooty. Paady jaduh̃n yhaneh̃my coo ja'a piäc̃ miänøcxāxāt. Ho'ogānnap̃ hānajt̃y je'ebā.

²³Coo ja'a Moisés myiñguiahy jaanč̃ teh̃m̃ yajxón, yu'uč̃h hajxy yaghijty t̃ägøøgp̃o'o. Hix, t̃õo ja'a gobiernā hānajt̃y hoy yhane'emy coo ja'a pigāna'c-huunghajxy quiøxy yagho'ogóøjāt ja'a ya'ayhāna'cpā. Ja'a Moisés tiaj tieedy, cabā gobiernā hajxy hānajt̃y chāhgø'oy. Miäbøjpiä Diosmädia'agy hajxy hānajt̃y. ²⁴Coo ja'a Moisés miäjøøñā, miäbøjc̃ je'ebā. Cabā gobiernā hānajt̃y tieedyhaphadaannā, ja'a hānajt̃y jim̃ tuumbā Egiptonaaxooty. ²⁵Hamdsoo jaduh̃n miānaañ coo ween yhäyoowhixyii møødā Dios quiu'ughajxy näguipxy. Cab hānajt̃y jim̃ miähmø'owaannā maa ja'a haxøøgcuhdujt̃ hajxy wyi'i tiuñān. Cab hajxy hānajt̃y ñajuø'oy coo hajxy hānajt̃y jejcy quia'a xoonda'agaannā. ²⁶Cabā Moisés ja'a j̃ioot jim̃ piādaacnā maa ja'a xādø'øñān jim̃ Egiptonaaxooty. Maas jootcujc̃ hānajt̃y ñijäwøoyyānā coo yhäyoowhix̃õjāt ja'a jäya'aguioøxpā, ja'a Dios hānajt̃y quixaambiā. Ñajuøøby hānajt̃y jaduh̃n coo ja'a hoybā weenbā mio'owa'añiijām ja'a Diósām. ²⁷Coo ja'a Moisés miäbøjcy, paady jim̃ chohnnā Egiptonaaxooty. Hoyyā gobiernā hānajt̃y jia jootma'ady, cabā Moisés nā'ägädā tsāhgøoyy. Tāhoctu'ubøquiā ja'a Moisés tiu'ubøjnā. Ja'a Diosmädia'agy hānajt̃y miäbøjpy, hoyyā Dios mānaa quia'a ja hixyii. ²⁸Coo ja'a Moisés miäbøjcy, paadiā pascuaxøø yagjajtā. Jaduh̃n yhaneh̃my coo ja'a tøghagø'ow nø'ty hajxy yajwiinxānicxó'owāt, nebiā judíos quiobhuunghajxy quia'a yaghó'cāxāt, ja'a

ya'ayhäna'cpä. Ja'a Dios ja'a mioonsä tsajpootypä tu'ug quejx coo ja'a quioobhuunghajxy yaghó'cäxät, ja'a ya'ayhäna'cpä, pönjatiä nø'ty hänäjty tøø quia'a yajwiinxänicxø'øy ja'a tøghagø'øw. ²⁹Coo judíoshajxy jaduhñ miäbøjcy, mänitä Dios ja'a Tsaptsmejy cujx yaghawaach maa hajxy jaduhñ ñaxø'øwät tø'ødstuum. Mänitä Egiptobä-jäya'ayhajxy hoy jia panaxaambä. Mänitä Dios ja'a nøø hoy yajtu'ugmújcombä. Cøjxä Egiptobä-jäya'ayhajxy ñøøho'ogø'øy. ³⁰⁻³¹Coo ja'a judíoshajxy miäbøjcy, paadiä cajpt hajxy juxtujc-hooc jiuhyohwiädijty ja'a xøhajpä Jericó. Mänitä tsaamuuch piuumnä. Je'e hänäjty curaahajp wäditiä maa ja'a cajptän. Cøjxä jäya'ayhajxy jiiby yho'nä, ja'a hajxy hänäjty ca'a mabøjpä. Coo ja'a quixy Rahab miäbøjcy, hoy hänäjty jia tuñ maa ja'a burdelän, paady jaduhñ quia'a ho'cy, je'leguixpä coo ja'a judíos hänäjty tøø yu'uëch, ja'a hajxy hänäjty wädijpä hixøøbiä woodsøøbiä.

³²Coo cu ñäbaadøøyy, cu nmädiäacyhöch ja'a Gedeón, ja'a Barac, ja'a Sansón, ja'a Jefté, ja'a David, ja'a Samuel, møødä Dios ja'a quíuguexyhajxy. ³³Coo hajxy miäbøjcy, paadiä miädsip ja'a ñaax hajxy hoy miämähmøøyyanä; paady hajxy hoy guobiernähajty; paadiä Dios hajxy xpiuhbéjtäm nebiaty hajxy hänäjty tøø xyajwiinwaanø'øyyäm; paady hajxy quia'a leontsu'tsä; ³⁴paady hajxy quia'a tooyy møjjøønhaajiooty; paady hajxy quia'a cuhbujxä. Ja'a häna'c-hajxy ca'a møcpä, mänitä

mäjaa hajxy piaaty mänaa hajxy hänäjty chiptuna'añän. Cabä miädsip hajxy yajmäjädaacy, hoyyä miädsiphajxy hänäjty jia nämayyä. Ñä'ägä yajpäyø'c hajxy je'e. ³⁵Jii ja'a to'oxiøjc-hajxy hänäjty näje'e ja'a yhuung ja'a ya'ay jiuypiojcy.

Näje'e ja'a Diosmädia'agy hajxy yajcudsaaçhtiunøøyyä. Coo ja'a Diosmädia'agy hajxy hänäjty quia'a nä'ägädä najtshixø'øwa'añ, mänit hajxy yaghó'cänä. Tøø hajxy hänäjty ñajuø'øy coo hajxy jiuypioğa'añ, coo hajxy jim ñøcxa'añ tsajpootyp. ³⁶Näje'e hajxy wyiinwohnä wiobho'cä. Høxtä yajcudsumøøyyä hajxy näje'e cø'øxoch. ³⁷⁻³⁸Näje'e hajxy quiuhga'tsä, näje'e hajxy jiøø'wa'xä, näje'e hajxy quiuhbujxä. Jim hajxy hänäjty näje'e wiädity pactuum, wiinwa'adstuum, tunjooty. Jim hajxy hänäjty näje'e chäna'ay tsaajutjooty. Cabä howyit hajxy hänäjty miøødä. Meeghac chivohac hajxy hänäjty wyithajpy. Jaguiay hajxy hänäjty yhity. Xøøghajtäp hajxy hänäjty, häyoowhíjxäp hajxy hänäjty. Paady hajxy hänäjty jaduhñ jiaty yhabety coo ja'a Diosmädia'agy hajxy hänäjty miäbøcy. Jaanç tehñ quiumáayyap hajxy hänäjty ja'a Diósäm. Cabä Dios jaduhñ quiumay pøn ca'a mabøjp. ³⁹Hoy hajxy jia cumaayyä, cab hajxy miooyyä mädyiijatiä Dios hänäjty tøø yajwiinwaanø'øy. ⁴⁰Jäguemiä Dios wyiinmahñdyhajty coo ja'a hoyhajt ja'a weenhajt hajxy xmio'owáanäm. Paadiä jecyjiiäya'ayhajxy quia'a tsoj mooyyä, näguipxiä Dios hajxy jaduhñ xmio'owáanäm møødä jecyjiiäya'ayhajxy.

12 Tsøgä jecyjiäya'ay hajxy jaduhñ pahíjxäm nebiä Diosmädia'agy hajxy miäbøjquiän. Tsøgä haxøøguhdujt hajxy najtshixøøyyäm. Tsøgä nhamdsoo cuhdujt hajxy høxhíjxäm. Je'eduhñ wiingtuum xjia wi'i wioonøcxäänäm. Tsøg hajxy tehngajnä cudiúunäm nebiä Dios hajxy xyhanéhäm. ²Tsøgä Jesucristo hajxy hamuumdul'joot pahíjxäm. Jaaya'ay hajxy xyajnahixøøyyäm coo ja'a Diosmädia'agy hajxy hoy nmäbøjcämät. Hoçhähdiuunnä ja'a Jesús mähdiojc jaduhñ yho'cy cruzøxp. Pero ñajuøøby hänäjty je'eduhñ coo hänäjty jim nøcxy xioonä'aga'añ tsajpootyp. Jim jaduhñ yhänaañ maa Dios yhaooyhaampiän.

³Tsøgä Jesucristo hajxy jahmiejtstáacäm coo jiaançh tehñ chaaçhpøjcy. Ja'a cahwiindøyhäna'c-hajxy jaduhñ jatcøøyy. Míee'xtujc ja'a Jesucristo jaduhñ. Tsøg hajxy jaduhñ pahíjxäm; jaduhñ hajxy nga'a jootmayhájätämät. ⁴Hoyyä haxøøgpä hajxy xjia mädsiphájätäm, cahnä hajxy jaduhñ xyaghó'cäm. ⁵Ja'a Dios hajxy jaduhñ xjiootcapxmøpøjcäm maa ja'a miädia'agy cujaay myiñän:

Huung, ca'a mjootma'ady, hoyyä Dios tøø xjia yajcumädooy.

Hoy xjia hojy, ca'a mjootmayhaty.

⁶Miägäpxyp yhanehmbiä Dios pønjaty chojpy; yajcumädooby pønjaty yhuunghajpy.

⁷Coo ja'a Dios hajxy yajcumädówät, mmee'xtúgäp

hajxy jaduhñ. Hopiønñä yhuung yajcumädooy. ⁸Yajcumädoobiä Dios ja'a yhuunghajxy nägøxiä; y pø caj mijts jaduhñ xyajcumädooy, cähxø'p jaduhñ coo ja'a Dios hajxy tøyhajt xquia'a huunghaty. ⁹⁻¹⁰Ja'a hajxy ndeedyhájätämbä hädaa yaabä naaxwiimbä, nwiingudsähgøøyyäm hajxy jaduhñ, hoy hajxy hijty xyajcumädóowäm mänaa hajxy tøø nmuutsc-hájätäm. Paady hajxy hijty xyajcumädóowäm coo hajxy hijty nga'a mädia'agymiäbøjcäm. Hoorä, tsøgä nDeedyhájätäm hajxy mädia'agymiäbøjcäm, ja'a jim tsajpootypä. Mänit hajxy jim xyaghíjtämät. Paadiä Dios hajxy xyajcumädóowäm, nebiä miädia'agy hajxy jaduhñ maas hoy nmäbøjcämät, nebiä hawa'adstuum hajxy jaduhñ hoy nhíjtänät nebiä Dios yhitiän. ¹¹Tøyhajt hajxy ndsaaçhpøjcäm mänaa ja'a Dios hajxy xyajcumädóowäm. Nbáatäm ja'a tsaächpä hajxy jaduhñ. Pøn jaduhñ mäbøgaamb hamuumdul'joot, cab jaduhñ waamb miäná'anät, hoy hänäjty jia tsaächpøcy. Maas hoy jiäya'ayhadaannä. Maas jootcujc yhidaannä.

¹²Naxy hajxy mdehñ ñijiootcapxmøcpøgøøjät neby hajxy jaduhñ hoy myo'oy mnáxät. ¹³Mhøxtá'awäp ja'a hodi'u hajxy, nebiä hermanodøjc hajxy jaduhñ hoy xpiawädítät, neby hajxy jaduhñ quipxy xquia'a padu'udägøyyät.

¹⁴Naxy hajxy hoy mdehñ yhídät tu'ugmädia'agy nägøxiä. Hoy hajxy mjäya'ayhádät. Pøn hoy ca'a wädijp, cab jim nøcxa'añ Dioswiinduum. ¹⁵Tehngajnä hajxy mnigwieendähadøøjät, neby hajxy

jaduhñ mǵa'a tu'udägóyyät. Coo pøn jadhñ tiu'udägóyyät, je'e jioot ca'a tsojp coo piuhbedóöjät ja'a Diósäm. Cab hajxy mnimiäjootma'adóöjät. Coo hajxy haagä jadhñ mjatcó'owät, pues nǵögxiä hajxy jadhñ mmá'adät. ¹⁶Cab hajxy mhaxóögwädítät. Cabä Diosmädia'agy hajxy myaghäyó'ogät. Jadhñä Esau jecy jiatcöøyy, coo hānajt yāho'ogyii; yajwiingubójc ja'a nādeedy ja'a cay. Paadiä nādeedy hānajt miøødä, coo hānajt quioobhuungä. Mo'owāanǵp hānajt jadhñ cøxiä mäduhñtiä ja'a tieedy hānajt miädsāna'ay. ¹⁷Y coo ja'a Esau jioot hānajt chocy coo cøxiä mio'owóöjät ja'a tiéediäm, cab tii nā'ä mooyyā, hoy jia jøøyy. Hamdsoo jadhñ quia'a niyaghoyøøyyä. ¹⁸⁻²²Ja'a Moisésajxy, jequiän hočhähgøøñäbä hajxy jim yhiixy miädooyy maa ja'a tunän ja'a xøhajpä Sinaí. Ja'a pojtāxa'a hajxy yhiix møødä jøøn jim maa hānajt jiaanč tehñ wyiingoodsän. Mānit hajxy miädooyy nebiä jāya'ay xiu'uxiän. Mānit hajxy miädooyy coo ja'a Dios quiapxy. Hočhähgøøñä ja'a Dios quiapxy. Jadhñä Dios yhanehmy coo hajxy hotyijatiä quihgá'adsät tijaty jim mejtsp maa ja'a tunän, hoy jia animalä. Pero cab hajxy miee'xtujnä. Mānitä Dios hajxy miānuu'xtaacy coo quia'a cápxnät. Moiséspaady je'e chähgøøñä. “Jaanch tehñ chähgøøbiøch, paady ndsäyuy”, nōmä Moisés miānaañ. Pero jim tsajpootyp jim Dioswiinduum, cab jim yhočhähgøøñän. Sión jim

xiøhaty maa ja'a Dios yhäña'ayän. Jadhñ jim xiøhajpä, ja'a Jerusalén tsajpootypä. Tøø ja'a Dios cuhdujt hajxy xmio'oy coo hajxy mwiingudsähgø'owät. Milhaamä Diosmoonsähajxy jim xioonda'agy Dioswiinduum. ²³Jimä Dioshuung yhaañämähajxy tiu'ugmucy ja'a xiøøhajxy tøøbä yajcujaayijjābä. Ja'a Diósäm hajxy yajnähwaats yajcuhwaatsä. Nǵögxiä ja'a Dios hajxy jim xwyiinmahñdyhixānām. ²⁴Jimä Jesucristo hajxy xñähgapxtúútäm nebiä Dios hajxy tøø xmiøødyajcuhdújcām hawiinjemy. Coo ja'a Abel jecy yagho'cä, mānitä Dios yaghawiimbijty. Pero coo ja'a Jesucristo hajxy tøø xñähho'túútäm, xyajnähwaats xyajcuhwāatsäm ja'a Dios ja'a nbojpä ngādieey hajxy. ²⁵Coo ja'a jecyjāya'ay ja'a Diosmädia'agy hajxy yaa quia'a mǵbøjcy hädaa yaabä naaxwiin, mānit hajxy yajcumädoowä. Hoorä, coo ja'a Dios hajxy xyhamdsoo hanéhñäm jim tsajpootyp, maas hanaxiä hajxy jadhñ njájtāmät coo ja'a miädia'agy hajxy nga'a mǵbøjcamät. Entonces, tsøg hajxy hamuumdu'joot mǵbøjcam. ²⁶Coo ja'a Dios jecy quiapxy, mānitä naaxwiin yajtsäyuyuyy. Jadhñ tøø miānaannä coo cøxiä yajtsäyuyyaannä jadāhooc møødä naaxwiin møødä tsajtcøxp. ²⁷Jadhñ miädia'agytiägø'oy coo ja'a Dios yajcuhdägoyya'añ tijaty tøø yhädiuñ møødä naaxwiin møødä tsajtcøxp. Pero mädyiijaty jim tsajpootyp, caj yajcuhdägoyya'añ. ²⁸Tsøgä Dios hajxy nāmāyayäm

Dioscujú'uyäp je'eguiøxpä
 coo hajxy jim̄ xyaghidáanäm
 tsajpootyp cøjxta'axiøø.
 Hamuumdu'joot ja'a Dios hajxy
 nwiingudsähgøøyyämät. Jaduhñ
 ja'a Dios hajxy xquiumáayyämät.
 29 Yajcuhdägoobiä Dios je'e tijaty
 jaduñ quia'a cumaaby.

13 Tsøg hajxy hamuumdu'joot
 niçhojc nibia'häyöowäm
 nebiä tu'ugpuhya'aybän. 2Coo
 pøn miédsät maa ja'a mdøjcän,
 hamuumdu'jootä mjøøn mdøjc
 hajxy mmó'owät. Näje'e hajxy
 tøø tiøjmo'oy ja'a Diosmoonsä
 tsajpootyp-tsohm̄bä. Cab
 hajxy hänäjty ñajuø'oy pø Dios
 mioonsähajxy je'e.

3 Mbuhbédäp hajxy ja'a
 jáya'ayhajxy hijpä tsumy, møød
 hajxy häyoowhíjxäbä. Hix,
 quipxy ja'a Diosmädia'agy hajxy
 mmøødmäbøcy.

4 Ja'a Dios jaduñ mänañ coo
 jáya'ayhajxy ñimiøødtsäna'awóøjät
 ya'adio'oxy. Cab jaduñ yhooyä
 coo ja'a mmägu'ughajpä tio'oxiøjc
 jaduñ mnä'a wi'i yhäyoowhíjxät,
 coo ja'a Dios jaduñ xñä'a
 yajcumädówät.

5 Cabä xädø'øn hajxy mwi'i
 piøcjuø'owät. Jootcujcä xädø'øn
 hajxy mmähídät, mäduhñtiä
 hajxy mmøødä. Tøø ja'a Dios
 jaduñ miäna'añ cooc hajxy ni
 mänaa xquia'a nähgue'egáanäm.

6 Paady hajxy hamuumdu'joot
 nmánáanämät:

Ja'a Dióshøch jaduñ xpiuhbejp.

Cábøch jaduñ pøn ndsähgø'øy,
 hoñéjpiøch hajxy cu xjia tun.

7 Mbahíxäp jáya'ay hajxy,
 ja'a Diosmädia'agy hajxy tøø

xyajnáhixø'øyäbä. Hamuumdu'joot
 ja'a Diosmädia'agy hajxy
 miäbøjcy. Hoy hajxy jiaançh tehñ
 jáya'ayhajty.

8 Cabä Jesucristo ja'a
 quiuhdujt mänaa yajtägach.

9 Cabä wiingmädia'agy hajxy
 mbadu'ubøgät. Coo ja'a Dios hajxy
 xchójcäm, maas hoy jaduñ coo
 ja'a miädia'agy hajxy nmäbøjcämät.
 Näje'e hajxy ñajtscapxø'øy cooc
 tyjy yhamajtscä, cábc tii
 mdsú'udsät mgáyät. Pero yø'ø
 cuhdujt jaduñmbä, caj yø'ø
 xpiuhbédät.

10 Tøø ja'a Jesucristo hajxy
 xñähho'túutäm, paadiä miädia'agy
 hajxy jaduñ nbanøcxäm. Pero
 pønä jecyquiuhdujt panøcxnä,
 cabä cuhdujt hajxy miøødä coo
 ja'a Jesucristo hajxy pianøcxät.

11 Jegyhajty ja'a teedywiindsøn
 animalnø'ty hajxy hijty quiuyoxø'øy
 maa ja'a muutscunuu'xytiøjcän,
 nebiä piojpä quiädieey hajxy jaduñ
 ñähwa'ads quiuhwá'adsät. Mänitä
 animalho'ogy hajxy hijty nøcxy
 ño'ogy cajtpa'a. 12 Jaanä jimä Jesús
 hoy yho'pä cajtpa'a. Jaduhñ hajxy
 xyajnáhwaats xyajcuhwáatsäm
 ja'a nbojpä ngädieeyháltäm.

13 Tsøgä jecyquiuhdujt hajxy
 najtshixøøyyäm. Tsøgä Jesucristo
 miädia'agy hajxy hamuumdu'joot
 panøcxäm, hoyyä cu'ug hajxy
 xjia xøøgháltäm. 14 Haa hädaa
 yaabä naaxwiinä, caj jiega'añ.
 Pero jim̄ njoot hajxy nbádäacäm
 tsajpootyp. 15 Tsøgä Dios hajxy
 tehngajnä wiingudsähgøøyyäm
 ja'a Jesucristocøxpä. Tsøg hajxy
 tehngajnä mänáanäm coo ja'a
 Dios miøjjä jiaançh. 16 Naxy

hajxy hoy mdehm̄ jāya'ayhādāt. Mbuhmó'owāp ja'a wiinghāna'c hajxy tijaty hajxy mmøød. Jaduhñā Dios hajxy xjiaančh tehñ quiumáyāt.

¹⁷Mmäbójcäp ja'a copc-hajpä miädia'agy hajxy. Xcwieendāhajp hajxy jaduhñ neby hajxy mga'a tu'udägóyyāt. Najuoøby hajxy coo hajxy wyiinmahñdyhixa'aññijām ja'a Diósäm. Naxy hajxy mdehm̄ miäböğät nebiä mgopc-hajpāhajxy jaduhñ yhidāt jootcujc. Coo hajxy mga'a mäböğät, cab hajxy hānajty jaduhñ tøø mniyaghoyø'øyii.

¹⁸Mdúnäbä mayhajt hajxy, pa'ya'axä Dios hajxy ja'a høøčhcøxpä. Hóyhøch nwädity. Chójpiøčhä njoot cooçh homiānaajä hoy nwädítāt. ¹⁹Chójpiøčhä njoot jaduhñ cooçh jim̄ jadāhooc nnøcxtägátsät maa mijtsän. Mānuu'xta'agä Dios hajxy cooçh jim̄ ween xyajnoçxy.

²⁰Jootcujcä Dios hajxy xjiaančh tehñ yaghíjtäm. Jaayá'ayädsä Jesucristo yagjuypiojtägajts, ja'a nWiindsønñhájäm. Jaayá'ayäts hajxy xmiøødyajcuhdújcäm ja'a

hawiinjemyguiuhdujt mānaa ja'a Jesucristo hajxy xñähho'túutäm. Cabä jemyguiuhdujt mānaa tiägatsaannä. Homiānaajä ja'a Jesucristo hajxy xñä'ägä cueendāhájäm. ²¹Weenä Dios hajxy xpiuhbety, nebiä miädia'agy hajxy jaduhñ hoy myajtúunät, ja'a Jesucristocøxpä. Jaduhñā Dios hajxy xquiumáyāt. Cøjxta'axiøø tsøg hajxy jaduhñ mänāanām coo ja'a Jesucristo miøjjä jiaančhä.

²²Hermanodøjc, cab hajxy mdsippädá'agät. Cábøch mijts madiu'u tøø nmägapxy tøø nhane'emy. ²³Tøø ja'a hermano Timoteo yhawa'adspädsøømnä maa ja'a pujxtøjcän. Coo yaa paquiä miédsät, mänítøch jim̄ nmødhádät maa mijtsän.

²⁴Yajpoo'x ja'a copc-hajpāhajxy ja'a høøčhcøxpä møødä hermanohajxy nägøxiä. Ja'a hermanodøjc-hajxy yaabä Italianaaxooty, xyajpoo'xp mijts jaduhñ.

²⁵Weenä Dios hajxy jaduhñ xjiaac mo'oy ja'a hoyhajt ja'a weenhajt. Amén.